



Loschs da la Viafier retica e cuntents cun il bun resultat da gestiun: Stefan Engler, president dal cussegl d'administraziun, Hans Amacker, director e Mario Cavigelli, cusseglier guvernativ (da san.).

FOTOS G. N. STGIER

«Schizunt la viafier senza è ina aventura»

Landquart: Festivitat 125 onns Viafier retica

DA GION NUTEGN STGIER / ANR

■ **En rotschas en vegnids ils envidads per gratular a la giubilara e tranter ils gratulants è er stada cussegliera federala Doris Leuthard. Cun la construcziun da la Viafier retica saja vegni contribui decisivamain al svilup d'ina regiun, ha ditg la ministra da traffic.** Ina societad illustra è s'entupada en la halla da fabricaziun da la Viafier retica a Landquart per assister a la festa da giubileum. Blera prominenza da la politica, da l'economia, dal turissem e da la cultura ha fatg in viva sin il giubileum da la Viafier retica. Er 125 onns suenter la construcziun da la viafier en tuts loschs da la «pitschna cotschna» e cunzunt er sin la lavur da pionier fatga durant quels onns da construcziun da la rait da la Retica. **Stefan Engler**, il president dal cussegl d'administraziun da la Viafier retica, ha ditg che la viafier fascineschia giasts da l'entir mund ed ella saja davairas in product miraculus. Losch saja el er da l'entusiassem dals 1400 emploiads per la viafier ed els sco er ils 20 000 anteriurs collavoraturs hajan contribui il pli da tut al success da la Viafier retica, ha punctuà Stefan Engler.

«La Retica è l'arteria dal traffic public»

Cusseglia guvernativ **Mario Cavigelli** ha en ses pled da giubileum per la Viafier retica fatg attent a l'impurtanza da la viafier per turissem ed economia. Ultra da quai saja ella per fitg bliers il product per s'identifigar cun il Grischun. La Retica saja gia 125 onns preschenta en noss chantun e quai vegnia er ad esser uschia en il futur, ha ditg il minister da traffic dal Grischun. Il product Viafier retica saja cunzunt er in purtader da reclama ed ina ferma pitga dal marketing. «La Retica è l'arteria dal traffic public», cun quels plets ha fini Mario Cavigelli ses buns giavischs per la giubilara.

«Ella lascha viver cultura ed istorgia»

En ses pled da gratulaziun ha ditg cussegliera federala **Doris Leuthard** ch'ella saja en tuttas modas e manieras fascinada da la Viafier retica. Ella laschia viver cultura ed istorgia, collieschia cun ses 114 tunnels e 582 punts valladas e lur carstgauns. Ultra da quai fetschia la Viafier retica visibla la natira spectaculara e multifara dal Grischun. La Retica saja betg mo in med da transport, ella saja senza ina attracziun e fascineschia turists da l'entir mund. «Schizunt la viafier senza è ina aventura», ha

menziunà la ministra da traffic da noss pajais. En la Viafier retica vegnia per exempel discurrì in cun l'auter dapli che en auters trens, nua che mintgin saja occupà cun ses smartphone, haja ella constatà, ha ditg cussegliera federala Doris Leuthard. La gratulanta da Berna ha er manegià che cun la construcziun da la viafier en noss chantun avant 125 onns saja vegni contribui decisivamain al svilup d'ina regiun a la coesiun da la Svizra e cun quai a l'avegnir da las generaziuns suandantas.

Vinavant sustegn da Berna

Cussegliera federala Doris Leuthard ha dentant er confermà che la confederaziun vegnia er en l'avegnir a sustegnair la Viafier retica. Dal riment appartegnan 43% da las aczias da la Retica a la confederaziun e 51% al Grischun. A l'ur da las festivitads da 125 onns ha er gi lieu la 126avla radunanza generala da la Viafier retica e quai en preschientscha da bunamain 400 acziunaris. Il director **Hans Amacker** ha preschenta cun luschezza las ceferas positivs cun in resultat annual da 261 milliuns francs. Sulet cun il transport da personas ha la Viafier retica fatg ina svieuta da stgars 98 milliuns francs. Transportà ha ella radund 10 milliuns passagiers.



Emprendistas ed emprendists da la Viafier retica en er vegnids a pled a la radunanza generala.



Giovanni Netzer, l'intendant dad Origen, ha inscenà per la festa da giubileum in spectacul en la halla da fabricaziun e fascinada da quel è er stada Doris Leuthard.



Da buna luna tar la festa da giubileum: Alois Maissen, anteriur cusseglier guvernativ, Peter Nicolay, president communal da Bravuogn e Vincent Augustin, deputà (da san.).



La Retica è ina buna raschun per far festa: Silva Semadeni, cussegliera nazionala, Ruedi Bruderer, schurnalist e cineast dal film da giubileum ed Andreas Thöny, deputà (da san.).



Dus Lumnezians e dus presidents communs da dus gronds lieus: Aurelio Casanova e Tarsizius Caviezel (da san.).



In discurs pli allegraivel tranter Doris Leuthard e Hans Amacker.